



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 036613 20 Iž**  
**Sarajevo, 07.08.2020. godine**

Sud Bosne i Hercegovine u Sarajevu, u vijeću Apelacionog odjeljenja sastavljenom od sudija: Mirsade Džindo, predsjednika vijeća, Dinke Bešlagić-Čovrk i Zvezdane Antonović, članova vijeća, odlučujući o žalbi i dopuni žalbe Nihada Čolpe u ime Građanskog Saveza, iz Sarajeva, ul. Salke Lagumdžije br. 9, protiv odluke Centralne izborne komisije Bosne i Hercegovine, broj: 06-1-07-3-874/20 od 01.08.2020. godine, u postupku ovjere koalicije, u nejavnoj sjednici održanoj dana 07.08.2020. godine, donio je

**R J E Š E N J E**

Žalba Nihada Čolpe, izjavljena protiv Odluke Centralne izborne komisije Bosne i Hercegovine, broj: 06-1-07-3-874/20 od 01.08.2020. godine, kojom je ovjerena prijava koalicije pod nazivom DEMOKRATSKA FRONTA-GRAĐANSKI SAVEZ, (kod 02930) za učešće na lokalnim izborima 2020. godine, odbija se kao neosnovana.

**O b r a z l o ž e n j e**

Odlukom Centralne izborne komisije Bosne i Hercegovine, broj: 06-1-07-3-874/20 od 01.08.2020. godine, overena je prijava koalicije pod nazivom Demokratska Fronta, Građanski Savez (kod 02930) sa sjedištem u Banja Luci, koju čine političke stranke Srpska napredna stranka (02930) iza učešće na lokalnim izborima 2020. godine, za 12 općina, dok je odbijena prijava navedene koalicije za učešće na Lokalnim izborima 2020 godine za općinu Zavidovići za organe vlasti OV/SO/GV/SG..

Protiv ove odluke žalbu je izjavio Nihad Čolpa ispred Građanskog saveza.

U žalbi, te dopuni žalbe se navodi da je Građanski savez na sjednici predsjedništva održanoj 23.07.2020. godine donijelo odluku da neće ići ni u kakvu koaliciju na predstojećim izborima 2020. godine na području Bosne i Hercegovine, Republike Srpske, kantona i općina. Predsjedništvu nije bilo poznato da je održan Kongres GS na kojem je izabran predsjednik stranke koji će kasnije potpisati ili je već potpisao sporazum o koaliciji sa političkom strankom DF.

Međutim, Nihad Čolpa nije dobio odluku o razrješenju sa funkcije predsjednika GS-a. Navodnom Kongresu stranke nisu prisustvovali najveći broj članova Kongresa pa smatra da nije ni postojao kvorum za njegovo održavanje, što nije u skladu ni sa važećim Statutom Građanskog saveza ni sa odredbama Zakona o političkim organizacijama.

Na rješenje Općinskog suda u Sarajevu od 22.07.2020. godine kojim je izvršena promjena lica ovlaštenog za zastupanje uložena je žalba, pa pošto isto nije pravosnažno, ne može proizvoditi pravne posljedice.

Na opisani način Centralna izborna komisija BiH je povrijedila izborno pravo žalitelja, zbog čega predlaže da se žalba usvoji što je predloženo i u dopuni žalbe te da se odrede mjere koje treba poduzeti na otklanjanju nepravilnosti.

Centralna izborna komisija Bosne i Hercegovine je u odgovoru na žalbu predložila da je žalba izjavljena od neovlaštene osobe, odnosno da se odbije kao neosnovana.

Žalba nije osnovana.

Iz stanja spisa, proizlazi da Odlukom Centralne izborne komisije BiH broj 06-1-07-3-874/20 od 01.08.2020. godine ovjerena prijava koalicije pod nazivom DEMOKRATSKA FRONTA-GRADANSKI SAVEZ (kod 02930) sa sjedištem u Sarajevu, koju čine političke stranke DEMOKRATSKA FRONTA, GRADANSKI SAVEZ (GS) za učešće na Lokalnim izborima 2020. godine u više osnovnih izbornih jedinica, za 12 općina, dok je odbijena prijava navedene koalicije za učešće na Lokalnim izborima za 2020. godinu za općinu Zavidovići.

I po shvatanju apelacionog vijeća ovog suda, pravilna je i zakonita osporena odluka Centralne izborne komisije Bosne i Hercegovine kojom je ovjerena prijava koalicije pod nazivom DEMOKRATSKA FRONTA-GRADANSKI SAVEZ za učešće na Lokalnim izborima 2020. godine, za navedene organe vlasti.

U postupku ovjere političkih stranaka za učešće na izborima, desile su se promjene unutar političkih stranaka u periodu od ovjere prijave političke stranke, do isteka roka za podnošenje prijave za ovjeru koalicije, te promjene lica ovlaštenog za zastupanje i predstavljanje političke stranke.

Naime, Općinski sud u Sarajevu je rješenjem, broj: 065-0-F1-20-000009 od 22.07.2020. godine odobrio upis promjene u jedinstvenom registru političkih organizacija i to promjene lica ovlaštenog za zastupanje i predstavljanje političke stranke, „GRADANSKI SAVEZ“ tako što je rješenje Općinskog suda u Sarajevu broj 065-0-F1-000020 od 03.01.2018. godine, - alineja II izreke izmjenjena na način da je u sudski registar upisan kao lice ovlašteno za zastupanje i predstavljanje Političke stranke Građanski Savez Muhamed Fazlagić, ul. Koševo br. 6/3, Sarajevo. Iz obrazloženja rješenja proizilazi da je za upis promjene lica ovlaštenog za zastupanje političke organizacije priložena sva dokumentacija propisana članom 23 Zakona o političkim organizacijama (Sl. List R BiH br. 27/91) te je primjenom citirane zakonske odredbe u skladu sa odredbom člana 6. Zakona o registraciji poslovnih subjekata u F BiH donio navedenu odluku.

U predmetnom slučaju je došlo do upisa promjene lica ovlaštenog za zastupanje o čemu je u postupku ovjere prijava za koalicije morala da vodi računa Centralna izborna komisija BiH, posebno što je blagovremeno obavještena o nastalim promjenama.

Apelaciono vijeće nalazi da je upisana promjena u jedinstvenom registru političkih organizacija nastupila danom upisa u registar, što je u predmetnom slučaju datum 22.07.2020.godine. Naime, odredbom člana 7. Zakon o političkim organizacijama jasno je propisano da politička organizacija stiče svojstvo pravnog lica upisom u sudski registar. Tako i upis promjena lica ovlaštenog za zastupanje i predstavljanje političke stranke pravno dejstvo stiče danom upisa, u konkretnom slučaju 22.07.2020. godine, pa kako nije propisano da upisana promjena djeluje prema trećim licima nakon pravosnažnosti rješenja o upisanoj promjeni, to su bez uticaja na drugačiju odluku žalbeni navodi kojima se ukazuje da je u toku žalbeni postupak po izvršenom upisu promjene lica ovlaštenog za zastupanje političke stranke Građanski savez, što je ponovo izneseno i u dopuni žalbe.

Imajući u vidu da su prijave političkih stranaka, članica koalicije Demokratska fronta i Građanski savez ovjerene u skladu sa članom 4.6 Izbornog zakona Bosne i Hercegovine i da je prijava podnesena u skladu sa članom 4.12 i 4.17 Izbornog zakona Bosne i Hercegovine, Centralna izborna komisija donijela je pravilnu i zakonitu odluku kada je ovjerala prijavu koalicije pod nazivom „Demokratska fronta-Građanski savez“ (kod 02930) za učešće na Lokalnim izborima 2020. godine za izbore u organe vlasti u više osnovnih izbornih jedinica (12 općina), zbog čega apelaciono vijeće nije ni cijenilo ostale žalbene navode, cijeneći ih irelevantnim.

Kako je u ovom postupku uložena i dopuna žalbe u kojoj su u potpunosti interpretirani isti navodi izneseni u žalbi to je Apelaciono vijeće cijenilo ujedno žalbu i dopunu žalbe kao žalbu nalazeći da je pobijana odluka CIK-a u potpunosti pravilna i zakonita.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj: 19/02 do 74/10) valjalo odbiti.

**PREDSJEDNIK VIJEĆA  
SUDIJA**

**Mirsada Džindo**